

**Nunalerinermik inuussutissarsiornerup siuarsarneqarnissaa pillugu Inatsisartut  
inatsisissatut siunnersuut nr. Xx xx. 2009-imeersoq**  
(Naalakkersuisunut ilaasortaq Ane Hansen, Inuit Atagatigiit)

**pillugu**

**Aalisarnermut ataatsimiititaliap**

**ISUMALIUTISSIISSUTAA**

**Siunnersuutip aappassaaneerneqarnerani saqqummiunneqartoq**

Inatsisartut Aalisarnermut, Piniarnermut Nunalerinermullu Ataatsimiititaliaat  
suliarinninnermini ukuningga inuttaqarpoq:

Inatsisartunut ilaasortaq Hans Aronsen, Siulittaasoq, Inuit Atagatigiit  
Inatsisartunut ilaasortaq Andreas Uldum, Siulittaasup tullia, Demokraatit  
Inatsisartunut ilaasortaq Anders Olsen, Inuit Atagatigiit  
Inatsisartunut ilaasortaq Hans Enoksen, Siumut  
Inatsisartunut ilaasortaq Siverth K. Heilmann, Atassut

**1. Siunnersuutip siullermeernera.**

Siunnersuut partiit tamarmik akornanni ataatsimut isigalugu Inatsisartuni tapersersorneqartoq  
Ataatsimiititaliap maluginiarpaa.

**2. Siunnersuutip imarissaa.**

Nunalerinerup imminut akilersinnaanera isiginiarlugu nunalerinermik inuussutissarsiummut  
tapiissuteqartarnermi sinaakkusiornissamut aalajangersaanissaq siunnersuummi pingaarnertut  
anguniarneqarpoq. Maannakkut tapiissuteqartarnermik aaqquissuussinermi periaaserineqartup  
allanngortinnissaa siunnersuummi siunertarineqanngilaq. Taarsigassarseriaatsit  
amerlassusaasa killilernerisigut aningaasat pitsaanerpaamik atorniarneqarnerat  
siunnersuummi anguniarneqarpoq, taamaalilluni nunaateqarnermik  
inuussutissarsiteqarnermut siunissami taarsigassarseriaatsit marlut atorneqassallutik.  
Tassaapput inuussutissarsiuutit siuarsarneqarnissaa pillugu taarsigassarsisitsineq aamma  
ingerlatsinermit aningaasartuutit taarsigassarsisitsineq. Siunnersuut malillugu  
Naalakkersuisut inuussutissarsiuutit siuarsarniarlugu taarsigassarsiat akilerneqarnissaannut  
tapiissuteqarsinnaapput, taamaalilluni taarsigassarsisup nammineq akilersuineranut  
sanilliullugu taarsigassarsiat sukkanerusumik nalikillilerneqarsinnaallutik. Pineqartoq  
aningaasatigut iluanaaruteqarnissaa ilimasaarutigineqarmat taamatut iliuuseqarneq  
taarsigassarsisup taarsigassarsinermit isumaqatigiissummik naapertuinissaanut  
kaammattuutaasussat Naalakkersuisunit naatsorsuutigineqarpoq. Peqqussummut atuuttumut

sanilliullugu suusupaginnittoqarnerani Naalakkersuisut iliuusissatut periusersinnaasaat assigiinngitsut killilerneqarput, tamatumammi kingunerisaanik peqqussummi atuuttumi akilersuinerluttunut pillaammik ernialiisarnerup kissaatigineqartutut sunniuteqanngitsoortartoq takuneqarsinnaammat. Aammattaaq pissutsit immikkut ittut pineqartillugit ukiut marlut tungaannut inuussutissarsiutit siuarsarniarlugit taarsigassarsianut akilersuutiniq kinguartitsisinaannermik siunnersuut imaqarpoq. Pissutsini immikkut ittuni akiliinissamut piffissaliussaq suli kinguartinneqarsinnaavoq. Inatsisissatut siunnersuut malillugu taarsigassarsinermi isumaqatigiissut suli eqqortinneqarsimanngippat periarfissaq tassatuaavoq taarsigassarsianik atorunnaarsitsineq, qularnaveeqqutillu tuniniarnissaat siunertaralugu tigusineq. Aammattaaq aaqqissuussinermut atuuttumut sanilliullugu siunnersuummi siamasinnerusumik isiginninniartoqarlunilu anguniagaqartoqarpoq, inatsisissatummi siunnersuummi oqariaatsit ”nunalerineq” aamma ”nunalerinermik inuussutissarsiuteqarneq” uumasuutiniq ingerlatsinertut kinguaassioritsinertullu, kiisalu orpinnik naatsitsinertut, naatitanik naatsitsinertut aamma ivikkanik naatsitsinertut paasisariaqarmata, tamatumalu saniatigut amernik meqqunillu atuinermut ingerlatsiviit aamma nassuiaatigineqarlutik.

### **3. Siunnersuutip tusarniaassutigineqarnera**

Siunnersuut manna tusarniaassutigineqarpoq ulloq 08. april 2009 akissuteqarnissamut killissarititaq ullormut 15. juli 2009-mut tigusassanngorlugu. Ukualu tusarniaanermut ilaatinneqarsimapput; Kalaallit Nunaanni Kommuneqarfiit Kattuffiat (KANUKOKA), Savaatillit Peqatigiit Suleqatigiissut (SPS), Konsulenttenesten for Landbrug, Sulisitsisut Peqatigiiffiat (GA), Nunaqavissut Sulisitsisut Kattuffiat (NUSUKA) aamma Sulinermik Inuutissarsiuteqartut Kattuffiat (SIK). Tusarniaanermi piffissaq killigititaasup qaangiunnerani oqaaseqaatinik Inuussutissarsiornermut aamma Suliffissaqartitsinermut Naalakkersuisoqarfimmit (matuma kingorna ISN) aamma ataatsimoorussamik tusarniaanermut akissuteqaammik Nunaateqarnermut Siunnersuisoqatigiinnit aamma SPS-ip siulersuisuinit tigusisoqarpoq. Ataatsimiititaliaq isumaqarpoq tusarniaaneq pitsaasumik ingerlanneqarsimasoq, aamma tusarniaanermi akissutit siunnersuummut nalinginnaasumik oqaaseqaatinut peqqisaartumik oqaaseqaasiorneqarsimasut. Taamaattumik naalakkersuisoqarfimmit tusarniaaneq maligassiutinertut isigisariaqarpoq.

### **4. Siunnersuutip ataatsimiititaliami suliarineqarnera**

Nunalerinermi pissutsit maanna atuuttut naleqqussarnissaat aamma inuussutissarsiummi atuisunut pitsaanerusumik atugassaqartitsinissaq inatsisissatut siunnersuummi anguniarneqarpoq. Kalaallit Nunaanni nunalerineq ineriartupilooqaaq, tamannalu inuiaqatigiinnut inuussutissarsiummullummi annertoqisumik piumasaqarfiuvoq. Ineriartorneq ingerlasoq qularnaarniarlugu sinaakkusiussatut piumasaqaatit ataavartumik naleqqussarnissaat pitsaanerpaanissaallu pingaaruteqartuusut Ataatsimiititaliaq isumaqarpoq. Nunalerineq aallartissallugu ineriartorteqqissallugulu akikitsuinnaanngilaq, taamaattumillu aallarnisarnermut, annertusaanermut, narsaatinik nutaanik naggorissaanermut il.il. taarsigassarsinissamut naammattumik aningaasaliisoqartarnissaa pingaaruteqarpoq. Imminut pilersornerulersinnaaneq periarfissaavoq, taamaalillunilu nunami maani pinngortitami isumalluutit amerlaqisut nungusaataanngitsumik atuinikkut imminut annertunerusumik napatitsisoqarsinnaalluni, naluneqanngitsutummi nunalerinermik inuussutissarsiuteqarneq annertoqisumik periarfissaqartitsivoq. Taamatuttaaq nunalerineq suliffissaqartitsinermut pitsaasumik sunniuteqataasinnaavoq, aaqqissuulluakkamimmi ingerlatsinikkut ukioq kaajallallugu suliffiusinnaasunik amerlanerusunik pilersitsisoqarsinnaammat. Kujataani

periarfissat avaqunneqarsinnaangillat, taamaattumillu inuussutissarsiutip siunissami periarfissaritai siuarsarniarlugit misilittagaalereersut atorluarnissaat pissusissamisoorportaaq. Inuussutissarsiutitsinnik ingerlatsinerup minnerunngitsumik aningaasarsiornermi ineriartornermut pilersitseqataasinnaasut pitsanngorsarnissaat nunatsinni tamatta soqutigisaraarput, taamaalilluta aningaasarsiorneq imminut napatinnerusoq aamma ilapittuutaassammat. Taamaattumik suli imminut pilersornerunissaq ineriartortinniarlugu nunalerinerup tungaatigut pitsaasumik ineriartortitsinissamik pilersitsinissamut kissaateqarpugut – minnerunngitsumik tunisassiat tunisassianik eqqussuineranut killiliisut siuarsaaviginissaat periarfissaatinniarlugu. Taamaattumik inatsisissatut siunnersuutip matuma periarfissiinneratigut nunalerinermut sinaakkutissatut piumasaqaatinik pitsaasunik atugassaqartitsinissaq Ataatsimiititaliap pisariaqartutut isigaa.

## 5. Ataatsimiititaliap inassutaa

**Ataatsimiititaliap isumaqatigiittup** siunnersuut **akuersissutigineqassasoq** inassutigivaa.

Taamatut oqaaseqarluni Aalisarnermut ataatsimiititaliap siunnersuut siuliani tunngavilersuutit innersuussutigalugit aappassaaniigassanngortippaa.

, Siulittaasoq

, Siulittaasup tullia